

ALAHADY - PAKA - TAONA A



NITSANGAN-KO VELONA TOKOA I JESOA

Ry Kristianina havana, ankafaliana sy ankaravoana ary am-pitiavana no anolorana ny fiarahabana sy ny firariantsoa ho antsika olo araiky jiaby, ho antsika mianakavy, ho antsika eglizy kely, eglizy fiombonana, eglizy fototra, eglizy iraka, isika diosezy jiaby ary izay rehetra afaka mamaky izao hafatra sy fampianarana amin'izao andron'ny Paka izao. Nitsangan-ko velona tokoa ny Tompo Aleloia. Tamin'ny Alahady ny sampankazo isika no nanomboka ny dingana lehibe rehefa avy nanao ny ezaka ny karemy dia tsy inona fa ny fidirantsika ao Jerosalema izany hoe i Jesoa mpiara-belona

amintsika ka miaraka aminy isika miditra ao Jerosalema. Fantantsika anefa fa ireo izay nihoby an'i Jesoa nanao hoe HOZANA ihany koa no nilaza tamin'ny zoma masina hoe FANTSIHO AMIN'NY HAZO FIJALIANA sy nanenjika azy ka namono azy. I Jesoa ilay novonoina iny, izy ilay tsy nanota, izy ilay nanaiky ho mpanota mba hanavotra atsika

Vakiteny I : Asa 10, 34a. 37-43

Tononkira : Sal. 117,

Vakiteny II : Kôl. 3, 1-4

Evanjely : Jo. 20, 1-9

mpanota rehetra, maty tokoa i Jesoa fa noho ny asan'Andriamanitra sy maha-Andriamanitra azy dia nitsangan-ko velona izy. Nankalazaintsika izany omaly hariva Asabotsy masina ka antitranterina amin'izao andro voalohan'ny herinandro izay fitsanganan-ko velona sy fahariana vaovao izao

Ry Kristianina havana, ireo vakiteny rehetra enontsika tamin'ny herinandro masina iny dia mahafantina ny fiainantsika manontolo : isika izay matetika mirehareha raha mahomby ny

fiainantsika, isika ihany koa dia tia manenjika noho ny tsy fahampian'ny finoana, noho ny fahalemena, noho ny tsy fanànantsika finiavana eo amin'ny fiainantsika dia resin'ny fakam-panahy isika ka lavo amin'ny fahotana. Mpiara-belona amintsika anefa i Jesoa ka izy tafatsangan-ko velona ankehitriny no mampitsangana atsika satria niara-naty amin'ny fahotana taminy isika, izany no mahatonga atsika ry havana malala isany, isika olo araiky jiaby, na amin'ny toerana maro samihafa dia faly isika mifampiarahaba satria nandresy izay farantampon'ny faharatsina dia ny fahafatesana i Jesoa ka raha miaraka aminy isika dia mitsangan-ko velona miaraka aminy koa.

Antitranterin'i Md Paoly ao amin'ny vakiteny faharoa : *“Esory re ny lalivay ela, mba ho vongana vaovao ianareo”* izany hoe esory izay mampirefarefa atsika amin'ny tany ka mahatonga atsika ho vatana ka mitoetra amin'ny fasana dia tsy inona fa ireo fialonana, fitiavan-tena, avonavona izay mandoto ny fiainantsika, mandoto ny fiainam-pianakaviana, ny fiainan'ny fiaraha-monina, ny fiainan'ny Eglizy isan-tsokajiny.

Amin'izao Paka izao miara-nitsangana amin'i Kristy isika ary izany no maha-olona.

Ny biby no mirefarefa dia mandady amin'ny tany fa isika kosa anefa homban'ny fahasoavan'Andriamanitra ka afaka miarina. Izany no dikan'ny batemy izay nohavaozintsika tamin'ny Asabotsy masina. Mijoroà isika ! Aoka hiala amin'ny fiainana lo ka hijoro amin'ny fiainana vaovao satria faahariana vaovao no dikan'ny Paka.

Nilaozan'i Jesoa ny fasana misy vatana lo ka aoka ny fandreseny koa hanampy atsika handao ny fiainantsika lo amin'ny fitiavan-tena sy hetraketraka ary herisetra isankarazany.

Anjarantsika ary amin'izao Paka izao hiaina ny iraka ataon'i Jesoa tafantsangan-ko velona ; *“Mandehana any Galile any aho no mahita anareo”*, maniraka atsika izy mba hiditra amin'ny fiainantsika, ho an'ny Galile tokoa isika hiala amin'ny fiainana taloha ka hihavao ary io fiainana io no iainantsika ny maha kristianina atsika.

Ny miala amin'ny fiainana lo dia mampanjaka ny marina. Ny manimba ny fiainantsika dia ny tsy fisian'ny fahamarinana, eto amin'ny tanindrazantsika ka na dia misy ny harena rehetra fa noho ny lainga sy ny tsy marina ary ny risoriso manjaka amin'ny fiainana andavanandro no mahatonga atsika ho mahantra. Eo anivon'ny sekoly fanabeazana dia ampianarina ny zanantsika mba hiala amin'ny risoriso manapotika ny fifandraisantsika, ilaina ny fampanjakana ny rariny sy ny hitsiny ao anatin'ny fifanajana. Anaovantsika ezaka ny fanajana ny tontolo iainana.

Fahariana vaovao ny Paka ka aoka isika hanaana ny maso vaovao eo amin'ny fifandraisana amin'ny zava-boahary, amin'ny tontolo iainantsika. Aoka mba hivelomintsika koa ny tontolo iainantsika izay nankinan'Andriamanitra amintsika tamin'ny fahariana io tontolo io.

Anatin'ny Paka isika izay fahariana vaoao ka aoka hikarakara sy hikolokolo ny tontolo iainana isika fa tsy hanapotika. Araka ny teny faneva ataontsika hoe : *“izay mitevy ala mamono taranaka, izay mamboly hazo dia manome aina”*.

Manome aina ny Paka ka aoka sanatria tsy hanapotika ny ala intsony fa hamboly hazo isika, hanome aina mba ho tontolo misy fanantenana tokoa ny tontolontsika.

Ezaka ataon'ny tanora izany eo am-piomanana ny JMJ : SAMBATRA NY MALEMY FANAHY FA HANDOVA NY TANY IZY, izany no toe-panahy ampianarin'i Jesoa amin'izao Paka izao.

Paka ny fiainantsika raha lavitra ny fanapotohana sy ny herisetra fa ho olona malemy fanahy, tsy hoe midika bonaika tsy miasa fa olona tompon'andraikitra miasa manome hery vaovao sy fanantenana vaovao eo amin'ny fiainantsika andavanandro.

Ny fitsanganan-ko velona raha nandresy ny fahafatesana i Jesoa araka ny ao amin'ny Evanjely *“Aza matahotra ianareo; fantatro fa mitady an'i Jesoa izay nofantsihana tamin'ny Hazofijaliana ianareo. Tsy ato Izy, fa efa nitsangana araka izay nolazainy Mandehana haingana milaza amin'ny mpianany fa efa nitsangana avy any amin'ny maty Izy; ary indro hialoha anareo any Galilea izy, any no hahitanareo Azy; izany àry, fa efa nilazako ianareo izay”*, Isika ary hirahina hanambara ny vaovao mahafaly amin'ny fiainantsika manontolo, izany ny fampitrahofana ny finoana sy ny fiainana. Izany no vokatry ny Paka milaza fa mpiara-belona amitnsika i Jesoa ka aoka ary hiroso amin'ny lalindalina isika amin'ny fiainam-pinoana fa indrindra amin'izao Paka izao.

Ry Jesoa Tomponay ô, hafaliana lehibe tokoa ho anay vahoakanao sy zandrino izao Paka izao satria nandresy ianao ka handresy miaraka aminao izahay amin'izao fankalazana ny Paka izao, izany no mahatonga anay hiredona hatraiza hatraiza ny Aleloia, ka tsy ambava fotsiny no hiredonanay azy fa asianay Aleloia ny fiainanay manontolo, asianay ny fitsanganan-ko velona sy fahariana vaovao. Tsy ho vitanay samirery izany, fantatrao ny fahalemenay sy ny fiainanay, hitanao tamin'ireo Apostoly izany ka ampio izahay hijoro ho tena vavolombelonao eo amin'ny fiainanay andavanandro ka ny fahasoavanao hanenika anay. Amin'izay hanjaka eto aminay tokoa ny fiadanana'ny Paka izay lazainao aminay hoe : *“ Homba anareo anie ny fiadanako”*

Enga anie eo anivon'ny eglizy kely fianakaviana, eglizy fiombonana, eglizy fototra, eglizy iraka, eo anivon'ny diosezy sy ny firenena maminay ity ny fiadanana, hanjaka eto aminay tokoa ilay fampihavanana izay manjaka amin'ny Paka izao fa tsy ny fampihavanana heverin'izao tontolo izao. Enga anie ho eto aminay tokoa ny fahamarinana ka hanjaka ny rariny sy ny hitsiny dia hikatsaka mandrakariva ny soa iombonana izahay eto anivon'ny firenenay sy izao tontolo izao. Amen

Mompera Arseveka Mgr Benjamin Ramaroson